

五
燈
會
元



中國佛教典籍選刊

[宋] 普濟 著

中國佛教典籍選刊

五燈會元

（下冊）

〔宋〕普濟著
蘇淵雷點校

五燈會元卷第十四

青原下七世

洞山延禪師法嗣

上藍慶禪師

瑞州上藍院慶禪師，初遊方，問雪峯：「如何是雪峯的的意？」峯以杖子敲師頭，師應諾。峯大笑。師後承洞山印解，開法上藍。僧問：「如何是上藍無刃劍？」師曰：「無。」曰：「爲甚麼無？」師曰：「闍黎，諸方自有。」

同安慧敏禪師

洪州同安慧敏禪師，初參洞山，問：「諸聖以何爲命？」山曰：「以不問斷。」師曰：「還有向上事也無？」山曰：「有。」師曰：「如何是向上事？」山曰：「不從問斷。」師於言下有省。住後，僧問：「請師一句。」師曰：「好記取。」

金峯志禪師法嗣

天池智隆禪師

廬山天池智隆禪師，在金峯普請般柴次，峯問：「般柴人過水否？」師曰：「有一人，不過水。」曰：「不過水還般柴否？」師曰：「雖不般柴，也不得動著他。」

鹿門真禪師法嗣

谷隱智靜禪師

襄州谷隱智靜悟空禪師，僧問：「如何是和尚轉身處？」師曰：「卧單子下。」問：「如何是道？」師曰：「鳳林關。」曰：「學人不會。」師曰：「直至荆南。」問：「如何是指歸之路？」師曰：「莫用伊。」曰：「還使學人到也無？」師曰：「甚麼處著得汝。」問：「靈山一會，何異今時？」師曰：「不異如今。」曰：「不異底事作麼生？」師曰：「如來密旨，迦葉不聞。」問：「古澗寒泉，甚麼人得飲？」師曰：「絕飢渴者。」曰：「絕飢渴者如何得飲？」師曰：「東吠東流，西吠西流。」

益州崇真禪師

益州崇真禪師，僧問：「如何是禪？」師曰：「澄潭釣玉兔。」曰：「如何是道？」師曰：「拍手笑清風。」問：

「如何是大人相？」師曰：「泥捏三官土地堂。」

鹿門譚禪師

襄州鹿門志行譚禪師，僧問：「如何是實際理地？」師曰：「南瞻部洲，北鬱單越。」曰：「怎麼則事同一家也。」師曰：「隔須彌在。」問：「遠遠投師，請師一接。」師曰：「從甚麼處來？」曰：「江北來。」師曰：「南堂裏安下。」問：「如何是清淨法身？」師曰：「戊亥年生。」

佛手巖因禪師

廬山佛手巖行因禪師，廬門人也。首謁鹿門，師資契會。尋抵廬山，山之北，有巖如五指，下有石窟，可三丈餘。師宴處其中，因號佛手巖和尚。江南李主三召不起，堅請就棲賢，開堂不逾月，潛歸巖室。僧問：「如何是對現色身？」師豎一指。法眼別云：「還有也未？」後示微疾，謂侍僧曰：「日午吾去矣。」及期，僧報日午也。師下牀，行數步，屹然立化。李主備香薪，茶毗，塔于巖之陰。

曹山霞禪師法嗣

嘉州東汀和尚

嘉州東汀和尚，僧問：「如何是向去底人？」師曰：「石女紡麻纈。」曰：「如何是却來底人？」師曰：「扇

車關楔斷。」問：「遍界是佛身，教某甲甚麼處立？」師曰：「孤峯頂上木人叫，紅焰輝中石馬嘶。」

草庵義禪師法嗣

龜洋慧忠禪師

泉州龜洋慧忠禪師，本州陳氏子。謁草庵，庵問：「何方來？」師曰：「六眸峯。」庵曰：「還見六眸否？」師曰：「患非重瞳。」庵然之。師尋回故山，屬唐武宗廢教，例民其衣。暨宣宗中興，師曰：「古人有言，上昇道士不受錄，成佛沙彌不具戒。」祇爲白衣，過中不食。不字而禪，迹不出山者三十年。述三偈以自見。曰：「雪後始知松柏操，雲收方見濟河分。不因世主教還俗，那辨鷄羣與鶴羣！多年塵事謾騰騰，雖著方袍未是僧。今日修行依善慧，滿頭留髮候然燈。形儀雖變道常存，混俗心源亦不昏。試讀善財巡禮偈，當時豈例作沙門。」謂門弟子曰：「衆生不能解脫者，情累爾。悟道易，明道難。」僧問：「如何得明道去。」師曰：「但脫情見，其道自明矣。夫明之爲言，信也。如禁她人，信其呪力藥力，以她綰弄揣懷袖中無難，未知呪藥等力者怖駭棄去。但諦見自心，情見便破。今千疑萬慮不得用者，未見自心者也。」忽索香焚罷，安然而化。全身葬於無了禪師塔之東。後數年，塔忽坼裂，連階丈餘。主僧將發視之，是夜宴寂中見無了曰：「不必更發也。」今爲沈陳二真身。無了姓沈，見馬祖。

同安丕禪師法嗣

同安志禪師

洪州同安志禪師，先同安將示寂，上堂曰：「多子塔前宗子秀，五老峯前事若何？」如是三舉，未有對者。末後師出曰：「夜明簾外排班立，萬里歌謠道太平。」安曰：「須是這驢漢始得。」住後，僧問：「二機不到處，如何舉唱？」師曰：「遍處不逢，玄中不失。」問：「凡有言句，盡落今時。學人上來，請師直指。」師曰：「目前不現，句後不迷。」曰：「向上事如何？」師曰：「迥然不換，標的卽乖。」

袁州仰山和尚

袁州仰山和尚，僧問：「如何是仰山境？」師曰：「白雲峯下猿啼早，碧嶂巖前虎起遲。」僧曰：「如何是境中人？」師曰：「寒來火畔坐，熱向澗邊行。」

歸宗憚禪師法嗣

歸宗弘章禪師

廬山歸宗弘章禪師，僧問：「學人有疑時如何？」師曰：「疑來多少時也？」問：「小船渡大海時如何？」師曰：「較些子。」曰：「如何得渡？」師曰：「不過來。」問：「枯木生華時如何？」師曰：「把一朵來。」問：「混然覓不得時如何？」師曰：「是甚麼？」

嵇山章禪師法嗣

雙泉道虔禪師

隨州雙泉山道虔禪師，僧問：「洪鐘未擊時如何？」師曰：「絕音響。」曰：「擊後如何？」師曰：「絕音響。」問：「如何是在道底人？」師曰：「無異念。」問：「如何是希有底事？」師曰：「白蓮華向半天開。」

雲居岳禪師法嗣

豐化令崇禪師

揚州豐化院令崇禪師，舒州人也。僧問：「如何是敵國一著碁？」師曰：「下將來。」問：「一棒打破虛空時如何？」師曰：「把將一片來看。」

藥山忠彥禪師

澧州藥山忠彥禪師，僧問：「教中道，諸佛放光明，助發實相義。光明卽不問，如何是實相義？」師曰：「會麼？」曰：「莫便是否？」師曰：「是甚麼？」問：「師唱誰家曲，宗風嗣阿誰？」師曰：「雲嶺龍昌月，神風洞上泉。」

梓州龍泉和尚

梓州龍泉和尚，僧問：「如何是祖師西來意？」師曰：「不在闍黎分上。」問：「學人欲跳萬丈洪崖時如何？」師曰：「撲殺。」

護國澄禪師法嗣

護國知遠禪師

隨州護國知遠演化禪師，僧問：「舉子入門時如何？」師曰：「緣情體物事作麼生？」問：「乾坤休駐意，宇宙不留心時如何？」師曰：「摠是戰爭收拾得，却因歌舞破除休。」

智門守欽禪師

隨州智門寺守欽圓照禪師，僧問：「兩鏡相照，爲甚麼中間無像？」師曰：「自己亦須隱。」曰：「鏡破臺亡時如何？」師豎起拳。問：「如何是和尚家風？」師曰：「額上不貼勝。」問：「如何是祖師西來意？」師曰：「把火燒天徒自疲。」

大安能禪師

安州大安山崇教能禪師，僧問：「師唱誰家曲，宗風嗣阿誰？」師曰：「打動南山鼓，唱起北山歌。」問：「如何是三冬境？」師曰：「千山添翠色，萬樹鎖銀華。」

薦福思禪師

潁州薦福院思禪師，僧問：「古殿無佛時如何？」師曰：「梵音何來？」曰：「不假修證，如何得成？」師曰：「修證卽不成。」

護國志朗禪師

隨州護國志朗圓明禪師，僧問：「如何是萬法之源？」師曰：「空中收不得，護國豈能該。」

靈泉仁禪師法嗣

大陽慧堅禪師

鄧州大陽慧堅禪師，初在靈泉，入室次，泉問：「甚麼處來？」師曰：「僧堂裏來。」泉曰：「爲甚麼不築著露柱。」師於言下有省。住後，僧問：「如何是玄旨？」師曰：「壁上掛錢財。」問：「如何是法王劍？」師曰：

「腦後看。」問：「如何是無相道場？」師曰：「佛殿裏懸幡。」問：「不借時機用，如何話祖宗？」師曰：「老鼠齧腰帶。」僧請益法身，師示偈曰：「扶桑出日頭，黃河輓底流。六六三十六，陝府灌鐵牛。」

五峯遇禪師法嗣

五峰紹禪師

瑞州五峯紹禪師，僧問：「如何是第一義？」師拍禪牀云：「若不是仙陀，千里萬里。」問：「如何是祖師西來意？」師曰：「迢迢十萬餘。」

廣德延禪師法嗣

廣德義禪師

襄州廣德義禪師，謁先廣德，作禮問曰：「如何是和尚密密處？」德曰：「隱身不必須巖谷，闌闌堆堆覩者稀。」師曰：「恁麼則酌水獻華去也。」德曰：「忽然雲霧靄，闌黎作麼生？」師曰：「採汲不虛施。」廣德忻然曰：「大衆看取第二代廣德。」師次踵住持，聚徒開法。僧問：「如何是佛？」師曰：「披蓑倒騎牛，草深不露角。」問：「如何是祖師西來意？」師曰：「魚躍無源水，鷲啼枯木花。」問：「如何是常在底人？」師曰：「臘月死蛇當大路，觸著傷人不奈何。」問：「如何是學人相契處？」師曰：「方木逗圓孔。」問：「如何是大寂滅海？」師曰：「鬧市走馬，不觸一人。」曰：「如何是大通智勝佛？」師曰：「孤輪罷照妙峯頂，汝報巴猿莫斷。」

腸。問：「如何是作無間業底人？」師曰：「猛火然鑪煮佛喋。」師因事示偈曰：「纔到洪山便踩根，四方八面不言論。他家自有眠雲志，蘆管橫吹宇宙喧。」問：「如何是古佛心？」師曰：「多年曆日雖無用，犯著應須總滅門。」曰：「或遇新曆日，又作麼生？」師曰：「運動修營無滯礙，何勞人市問孫贖？」問：「時人有病醫王醫，醫王有病甚人醫？」師展手曰：「與我診候看。」曰：「不會。」師曰：「須彌徒作藥，四海謾爲湯。」問：「向上一路，千聖不傳。和尚還傳也無？」師曰：「鐵丸驀口塞，難得解吞人。」問：「如何是佛法大意？」師曰：「雪寒向火，日暖隈陽。」問：「如何是賓中賓？」師曰：「蕩子無家計，飄蓬不自知。」曰：「如何是賓中主？」師曰：「茅戶掛珠簾。」曰：「如何是主中賓？」師曰：「龍樓鋪草坐。」曰：「如何是主中主？」師曰：「東宮雖至嫡，不面聖堯顏。」問：「有一室女，未曾嫁娉，生得一子，姓箇甚麼？」師曰：「偶然衫子破，闌外没人縫。」問：「如何是不落階級底人？」師曰：「胎中童子眉如雪。」問：「如何是不睡底眼？」師曰：「昨夜三更擘不開。」問：「諦信底人信箇甚麼？」師曰：「莫道冰無火，斯須紅焰生。」問：「如何是密室？」師曰：「茅茨當大道，歷劫没人敲。」問：「如何是異日已前人？」師曰：「萬年枯木鳥銜來。」問：「懸崖峭峻，還具得失也無？」師曰：「忻逢良便，好與一推。」問：「牛頭未見四祖時如何？」師曰：「鮮靈乍開蠅啼啼。」曰：「見後如何？」師曰：「底穿蕩盡冷湫湫。」

廣德周禪師

襄州廣德周禪師，僧問：「魚向深潭難避網，龍居淺水却難尋時如何？」師曰：「遍體崑崙黑，通身一

點霜。」問：「貧子歸家時如何？」師曰：「人門不見面，處處故園春。」問：「命盡祿絕時如何？」師曰：「死。」曰：「此人落歸何道？」師曰：「薰薰彌宇宙，爛壞莫能拈。」問：「聞話不覺時如何？」師曰：「遍界沒聲人，誰是知音者？」曰：「如何是知音者？」師曰：「斷絃續不得，歷劫響泠泠。」問：「教中道，阿逸多不斷煩惱，不修禪定，佛記此人成佛無疑。此理如何？」師曰：「鹽又盡，炭又無。」曰：「鹽盡炭無時如何？」師曰：「愁人莫向愁人說，說向愁人愁殺人。」問：「如何得念念相應去？」師曰：「驚水魚龍散。」曰：「念念相應後如何？」師曰：「海北天南各自行，不勞魚鴈通消息。」

石門蘊禪師法嗣

石門慧徹禪師

襄州石門慧徹禪師，僧問：「金烏出海光天地，與此光陰事若何？」師曰：「龍出洞兮風雨至，海岳傾時日月明。」問：「從上諸聖向甚麼處去也？」師曰：「露柱挂燈籠。」問：「如何是和尚家風？」師曰：「解接無根樹，能挑海底燈。」問：「如何是祖師西來意？」師曰：「少林澄九鼎，浪動百花新。」問：「如何是佛法大意？」師曰：「三門外松樹子，見生見長。」問：「三身中那身是正？」師曰：「報化路頭橫鳥道，石人眼裏不栽花。」問：「雲光作牛，意旨如何？」師曰：「陋巷不騎金色馬，回途却著破襦衫。」問：「年窮歲盡時如何？」師曰：「東村王老夜燒錢。」問：「一毫未發時如何？」師曰：「后羿不調弓，箭透三江口。」問：「如何是佛？」師曰：「樵子度荒郊，騎牛草不露。」曰：「如何是騎牛草不露？」師曰：「遮掩不得。」問：「如何是靈利底物？」

師曰：「古墓毒蛇頭戴角。」又曰：「維摩不離方丈室，文殊未到却先知。」又曰：「垢膩汗衫皂角洗。」因令初上座領衆來參，師問：「萬仞峯頭石牛吼，穿雲渡水意如何？」初無對。師曰：「山僧住持事大，參堂去。」師後令僧下語，或云：「久嚮和尚，」或云：「訪道尋師明的旨，覺了根源顯異機。」師曰：「當時初上座若下得這語，不將他作參學人。」上堂：「一切衆生，本源佛性。譬如朗月常空，祇爲浮雲翳障，不得顯現。爲明爲照，爲道爲路，爲舟爲楫，爲依爲止，一切衆生，本源佛性，亦復如是。」時汾陽昭和尚在衆，出問：「朗月海雲遮不得，舒光直透水晶宮時如何？」師曰：「石壁山河非障礙，閻浮界外任昇騰。」陽曰：「恁麼則千聖共傳無底鉢，時人皆唱太平歌。」師曰：「太平曲子如何唱？」陽曰：「不墮五音，非闕六律。」師曰：「還有人和得麼？」陽曰：「請和尚不悋慈悲。」師曰：「仁者善自保任！」

含珠哲禪師法嗣

龍穴山和尚

洋州龍穴山和尚，僧問：「如何是西來意？」師曰：「騎虎唱巴歌。」問：「既是善知識，爲甚麼却與土地燒錢？」師曰：「彼上人者難爲隣對。」

大乘山和尚

唐州大乘山和尚，僧問：「枯樹逢春時如何？」師曰：「世間希有。」問：「如何是四方八面事？」師曰：

「升子裏踔跳，斗子內轉身。」

延慶歸曉禪師

襄州延慶院歸曉慧廣禪師，僧問：「言語道斷時如何？」師曰：「兩重公案。」曰：「如何領會？」師曰：「分明舉似。」問：「如何是鳳山境？」師曰：「好生看取。」曰：「如何是境中人？」師曰：「識麼？」

含珠山真禪師

襄州含珠山真禪師，僧問：「師唱誰家曲，宗風嗣阿誰？」師曰：「含珠密意，同道者知。」曰：「怎麼則不假羽翼，便登霄漢去也。」師曰：「鈍。」問：「古鏡未磨時如何？」師曰：「昧不得。」曰：「磨後如何？」師曰：「黑如漆。」

紫陵一禪師法嗣

廣福道隱禪師

并州廣福道隱禪師，僧問：「如何是指南一路？」師曰：「妙引靈機事，澄波顯異輪。」問：「三家同到請，未審赴誰家？」師曰：「月印千江水，門門盡有僧。」

紫陵微禪師

紫陵微禪師，初到夾山，山問：「近離甚處？」師曰：「向北山。」曰：「是何宗徒？」師曰：「昔日老胡師子吼，頂門一裂至如今。」住後，僧問：「如何是紫陵境？」師曰：「寂照燈光夜已深。」曰：「如何是境中人？」師曰：「猿啼虎嘯。」問：「寶劍未出匣時如何？」師曰：「磐陀石上栽松柏。」問：「如何是大猛烈底人？」師曰：「石牛步步火中行，返顧休銜日中草。」曰：「如何是五逆底人？」師曰：「放火夜燒無相宅，天明戴帽入長安。」曰：「如何是孝順底人？」師曰：「步步手提無米飯，斂手堂前不舉頭。」問：「如何是祖師西來意？」師曰：「紅爐焰上碧波流。」

興元大浪和尚

興元府大浪和尚，僧問：「既是喝河神，爲甚麼被水推却？」師曰：「隨流始得妙，住岸却成迷。」

洪州東禪和尚

洪州東禪和尚，僧問：「如何是密室？」師曰：「江水深七尺。」曰：「如何是密室中人？」師曰：「此去江南三十步。」僧問：「如何是新吳劍？」師作拔劍勢。

同安威禪師法嗣

陳州石鏡和尚

陳州石鏡和尚，僧問：「石鏡未磨，還鑿照否？」師曰：「前生是因，今生是果。」

青原下八世

谷隱靜禪師法嗣

谷隱知儼禪師

襄州谷隱知儼宗教禪師，登州人也。僧問：「師唱誰家曲，宗風嗣阿誰？」師曰：「白雲南，傘蓋北。」問：「如何是迦葉親聞底事？」師曰：「速須吐却。」問：「如何是諸佛照不著處？」師曰：「問這山鬼窟，作麼？」曰：「照著後如何？」師曰：「咄精怪。」問：「千山萬水，如何登涉？」師曰：「舉步便千里萬里。」曰：「不舉步時如何？」師曰：「亦千里萬里。」

普寧法顯禪師

襄州普寧院法顯禪師，僧問：「曩劫共住，爲甚麼不識親疏？」師曰：「誰？」曰：「更待某甲道！」師曰：